

# INUIT ATAQATIGIIT

## Inatsisartuni



UPA 2019/pkt. 131  
08.05.2019  
Aqqa Samuelson

**Nakorsat namminersortut nakorsiartarfimmik ingerlatsinissaminnut inatsisitigut allatigullu aporfigisinnaasartagaannik Naalakkersuisut UKA2019-mut misissueqqullugit peqquneqarnissaannik Inatsisartut aalajangiiffissaattut siunnersuut. Misissuinermilu siunnersuutigineqassaaq aporfiusinnaasut qanoq aaqqinneqarsinnaasersut.**

(Inatsisartunut Ilaasortaq Siverth K. Heilmann, Atassut).

Siullermik siunnersuuteqartumut Siverth K. Heilmannimut, siunnersuummullu pingaaruteqartumut Inuit Ataqatigiit qujapput. Imatullu oqaaseqarfigissavarput:

Inuit Ataqatigiit anguniarparput innuttaasut tamatta peqqinnerulernissarput. Peqqissuuneq paasisarparput timikkut, tarnikkut anersaakkullu inuummarissutsimiittoq.

Siullermik inuttut ataasiakkaatut inuummarinnerunissarput akisussaaffigaarput. Inuit Ataqatigiinniit upparaarput innuttaasugut tamatta annertunerpaatigut, inuunerup erlinnartuuneranik pingaartitsisuusugut.

Taamaattoq inuiaqatigiittut pisariaqartitagut aallaavigalugit peqqinnissaqarfimmit nakorsaniillu pitsaasumik sullinneqarnissarput pisinnaatitaaffigiuartariaqarparput. Pisinnaatitaaffik taanna atuutissaaq, niuiarsimagutta, ississimagutta, siuserigutta allatulluunniit peqqiilluuteqarutta. Tassani aamma ilaalluinnarpoq, nappaassuarmik katsorsarneqarsinnaanngitsumik eqqorneqarsimagutta.

Tamanna piviusumik pitsaasumillu anguneqassappat unammilligassat annertupput, immikkullu napparsimalinnginnissaq anguniarlugu pinaveersaartitsineq qaammarsaanerlu sakkutut pingaarnertut atortariaqarpavut, innuttaasut peqqissumik inuuneqarnissaat qulakkeerumallugu.

Inuit Ataqatigiit ilisimavaat, nunarsuaq tamakkerlugu inooriaatsimik tunngaveqartumik nappaataalersartut annertusiartuinnavissut. Tamanna siunissami peqqinnissaqarfimmut, anner-tuumik aningaasatigut nammakkiisinnaavoq. Taamaattumik inuiaqatigiittut eqqummaa-riffigissavarput, pinaveersaartitsineq sakuussammat pingaaruteqartoq.

Inuit Ataqatigiit anguniartuarpaat inuiaqatigiinni nalinginnaasumik inuunerup pitsaassusaata peqqissutsillu qaffassartuarnissaat, inuiaqatigiit inuiattut inerikkiartornerannut peqataasinnaasut tamaasa pisariaqartikkatsigit. Tamatumani sanngiinnerusut, soorlu tarnimikkut nappaatillit utoqqaat meeqqallu immikkut eqeersimaarfiginissaat pingaartuuvoq.

Nakorsartittussat amerlanerpaat toqqissisimanissaat, pilertornerusumik nakorsamit sullinneqartariaqartut sullinneqarnissaat pingaartipparput, tassami nappaatip paasilertorneqarnissaa – kingusinaartoqartinnagu nappaatip katsorsarneqarnissaa qulakkeerneqartariaqarmat.

# INUIT ATAQATIGIIT

## Inatsisartuni



Inuit aalajangersimasumik aamma immikkuullarilluinnartumik nappaatillit nunatsinni peqqinnissaqarfiup tungaaniit ikiorserasuarneqarnissaminnik periarfissaalatsisarnerat aaqqiiviginiarlugu Naalakkersuinikkut suliniuteqartoqarnissaa pisariaqalivippoq. Inuppassuit immikkuullarissumik qaqutigootumillu nappaateqartut peqqinnissaqarfimmi suleriaatsip pitsaasumik sullissinermikkut matussusersinnaasangikkaat tamanit naluneqanngilaq.

Siunnersuut innuttaasut nakorsamit pitsaanagerusumik pilertornerusumillu sullinneqarsinnaatitaalernissaannut ilapertuutaasinnaalluurtutut isumaqarfigigatsigu, siunnersuut iluatinnaateqartutut ilalernartutullu nalilerparput, nakorsat namminersortullu nakorsiartarfeqarnermikkut kivitseqataasinnaanerat upperigatsigu.

Nunatsinni peqqinnissaqarfiup atugassarititaasa pitsaassutsimikkut killeqarpallaarnerat tunngavigalugu nunatsinni najugaqarsinnaajunnaarlutik nunatta avataanut nuuginnartartut amerlasoorujussuusut oqaatigineqartarmat nutaarsiassaangilaq. Tamanna nunap innuttaqassutsimigut amerlisarusuttut naliginnaasutut isiginagu immikkorluinnaq suliassatut pingaarutilittut tigusariaqarpaa. Tamattami nunatsinni atukkavut akisussaaqataaffigaagut.

Nunatta inuttusiartornissaa, aamma inuuffigiuminartuunissaa anguniarutsigu peqqinnissaqarfik innuttaasullu nakorsamit sullinneqarnerat inuup pineqartup nalilersuineranut qitiulluinnartarmat tupinnartuunngilaq. Imaappoq, Inatsisartunut Naalakkersuisunulluunniit ilaasortaagutta iliuusissatsinnik ataatsimoorussassatsinnik anguniagassatsinnillu pingaarutilerujussuarnik amigaateqarpugut nakorsat namminersortut nakorsiartarfiutillillu inerisaaffiginissaat eqqarsaatigalugu.

Nakorsat namminersortut qanoq ilillutik Peqqinnissaqarfiup unammilligassaanut kivitseqataasinnaappat? Qanoq pitsanngorsaaniissamut sinaakkutissat nutartereqataaffiginnaavaat?

Apeqqutit taamaattut pingaarutillit akissutissarsariaqarpagut. Siunnersuummi matumani Nunatsinni nakorsat namminersortut nakorsiartarfimmik ingerlatsisinnaalernissaannut toqqammavissaannik iliuusissaannillu ujartuineruvoq. Pineqartormi tassaavoq nunatsinni inuit immikkuullarissumik nappaatillit aamma maani nunatsinni inuttut naleqartinneqartutut pineqarlutik nakorsamit ikiorasuarneqartarnissaasa pitsanngortinnissaa.

Nakorsat namminersortut nakorsiartarfiutillillu Nunatsinni kivitseqataanissaat Peqqinnissaqarfimmullu unammilligassaqareeqisumut tapertaalluarlutik innuttaasunut sullissisinnaatitaanissaat Inuit Ataqatigiit pingaartuutippaat. Taamaattumik nakorsat namminersortut nakorsiartarfimmik ingerlatsinissamut inatsisitigut aporfiit minnerpaaffilerniarlugit misissuinerit qulajaanerillu ingerlanneqartariaqartut Inuit Ataqatigiit isumaqarput, nakorsat namminersortut nakorsiartarfimmik ingerlatsisinnaanissaat qulakkeerniarlugu.

Nakorsat namminersortut nakorsiartarfinnik nutaanik siuarsaarusuttut suleriaasiat, siuarsaanerat aamma Namminersorlutik Oqartussat suleqatiginiarneranni aporfigisartagaat anigorniarlugit inerisaanermi misilittakkat aallaavigalugit aaqqiissutissat iliuusissallu katersorneqartariaqarput.

Taamatut oqaaseqarluta siunnersuut taperserlugu aappassaaneerneqannginnerani Ataatsimiititaliamut susasaqartumut ingerlateqqinneqarnissaa innersuupparput.